

摘藻堂四庫全書薈要

集部

欽定四庫全書薈要卷一萬五千六百二十

集部

誠齋集卷四十三

宋 楊萬里 撰

賦

浯溪賦

予自二妃祠之下故人亭之旁招招漁舟薄遊三湘風
與水其俱順未一瞬而百里歛兩峯之際天儼離立而
不倚其一怪怪竒竒蕭然若仙客之鑑清漪也其一蹇

蹇諤諤毅然若忠臣之蹈鼎鑊也怪而問焉乃浯溪也
蓋唐亭峙其南岵臺歸其北上則危石對立而欲落下
則清潭無底而正黑飛鳥過之不敢立迹予初勇於好
竒乃疾趨而登之挽寒藤而垂足照衰容而下窺忽焉
心動毛髮森監乃跡故步還至水滸剝苔讀碑慷慨弔
古倦而坐於釣磯之上喟然嘆曰惟彼中唐國已膏肓
匹馬北方僅獲不亡觀其一過不日而殺三庶其人紀
有不數矣夫曲江為篋中之羽雄狐為明堂之柱其邦

經有不蠹矣夫水蝗稅民之畝融豎椎民之髓其夫人之心有不去矣夫雖微祿兒唐獨不實厥緒哉觀馬嵬之威垂渙七萃之欲離殪尤物以說焉僅平達於巴西吁不危哉嗟乎齊則失矣而楚亦未為得也靈武之履九五何其亟也宜忠臣之痛心寄春秋之二三策也雖然天下之事不易於處而不難於議也使夫謝奉冊於高邑稟重巽於西帝違人欲以圖功犯衆怒而求濟天下之士果肯欣然為明皇而致死哉蓋天厭不可以復

祈人潰不可以復支何哥舒之百萬不如李郭千百之
師推而論之事可知矣且士大夫之捐軀以從吾君之
子者亦欲附龍鳳而攀日月踐台斗而盟帶礪也一復
蒞以耄荒則夫一呼萬旗者又安知其不掉臂也耶古
語有之投機之會間不容繸當是之時退則七廟之忽
諸進則百世之揚解嗟肅宗處此其實難為之九思而
未得其計也已而舟人告行秋日已晏太息登舟水駛
於箭回瞻兩峯江蒼茫而不見

歸歟賦

繫端月之涉七兮諏其日則曰人倦予遊於道路兮念
求以憇予神豈不愛窻月之娟好兮睡鄉檄予以卜鄰
曾不及於解衣兮遑暇脫予之中悅栩栩以一適兮忽
乎還家而及門忘予身之為羈兮驟喜覩予之親炯鶴
髮之予照兮一哂以勞予勤環兒女之挽袖兮雞犬亦
為之載欣予親呼酒以予酌兮奚未舉而既失驚客舍
之已晨兮窻不見月而見日風挾寒以薄人兮巧尋罅

以入室纔予親之膝下兮夢覺而千其里湛清虛之易
溢兮潛予面其如洗推予枕其不能寐兮捐衾裯而又
不能起嗟予生之艱勤兮墨兵納我於學林慕黃口而
輕予之明月兮以耒耜而易搢紳既自山海之棄而粥
於市兮又何嘆池活而籠馴羌初心之豈其然兮亦曰
負米而為貧家焉金吾親兮公爾以芹吾君惟是行之
猖狂兮隨薦書以叫閤謁帝久而乃覲兮豈不就於一
列其如金甌之空兮履無當而衣有結樂調飢而濟渴

兮摠幸有層冰之與積雪仰王都之造天兮非都盧其
奚躡反而顧予之蹙足兮欲自雜於汗血夢歸而不歸
兮不念吾親之指嚙歸歟歸歟豈南溪之無泉兮南山
之無巖

中秋月賦

乾道丙戌中秋與友人王才臣埜酌言及師友
有懷紫岩先生慨然賦之

湛秋旻之不瑕兮泝桂月其耿然驚玉車以雙輪兮挂

孤鏡之明蠲何秋半而明倍兮乃大異於他之夕豈望
舒之革面兮抑羿妃之增飾繫天地潔齊之氣兮肇允
乎否而允乎澈蓋風露無所容其清兮播為秋而裒為
月竟歲年以俟此月兮一之遭而百違幽人得此豈不
偉兮乃未憖而既悲始予行之詰曲兮志乎南而趾北
不臨深於孟之海兮矧踐迹乎顏之域自德人之振我
兮初予導夫康莊予竭蹶以無愛兮柰之何阻且長莖
予馬以疾其驅兮僕夫告予以餒而舉一世以好徑兮

予乃獨背而馳予蘭茹而菊餐兮豈求飽之故也臞予
躬以鷺立兮彼腴者哂予誤也予既瞭而忽眩兮欲陳
詞於德人痛斯人之九京兮滔滔者知其津清莫清兮
秋之節明莫明兮秋之月所美之不可雙止兮予豈不
知其可悅裏乎慨而感表兮亦不自知其奚為而苑結
嗟人生之處此兮前萬斯古而後億年競權利之屑宰
兮奚甘帶之異旃逐逐焉金椎之控頤兮纍纍焉蒼苔
之蝕其骨何如予與子之迨暇兮又邂逅此秋月悲秋

豈其達人兮愛月迺我輩事及金樞之未央兮獨可有
酒而無醉

秋暑賦

楊子心疲於詩而病矐目疲於書而病眚故其畏熱如
喘牛之見月其喜冷如渴井而得綆丁亥八月秋暑特
甚蓋歲行之十暮未有今歲秋陽之強梗楊子不堪其
熱仰而嘆曰江南何物以餉餽惟春寒秋暑之二味古
諺有謂也安得萬里之長風吹層冰滿太空以蕩此秋

陽之餘紅者耶疇昔之夜袒肩露足呼竹君以為床命
桃笙而同宿見一熒之青燈猶憎其助秋暑而為酷夜
半驚起飛雨驟至劃悲風之怒號借一鼓之聲勢淅淅
乎牖戶之欲洒急雪也洶洶乎松竹之摧落枝葉也磔
磔乎茅屋之震響將壓也犬雞夜鳴兒女咿嚶縮頸入
腹皆作寒聲楊子亦震掉瑟縮而不寧視締綌其若仇
歎衣褐之未營既不能寐坐而太息曰凍者願烈日之
不夕暘者思秋氣之一條不得則思既得則悲悲與思

其循環老忽至而不知俛仰千載孰能逃造物之化機
蓋有能逃之者矣春不能燠秋不能肅天地不能老古
今不能局聞之前修太上立德次功次言所立惟擇三
者必不能已而去惟功則繫乎通塞至於德也者照宇
宙之珠玉也言也者載仁義之舟楫也稟焉於穹富以
其躬莫歟其豐莫塞其通不曰國功而曰聖功楊子則
窮且老矣抑知有未嘗老未嘗窮者耶彼造物者自寒
自暑自風自雨亦何關於汝

月暈賦

楊子與客暮立於南溪之上玩崩雲於袂疇聽古樂於
蛙水快哉歡欣意若未已偶空谷之足音予與客而亟
避退而坐於露草之徑衣上已見月矣寒空瑩其若澄
佳月澈其如冰一埃不騰一氛不生楊子喜而告客曰
吾聞東坡先生之夫人曰春月之可人非如秋月之淒
人也吾亦曰今之時則夏矣月尚春也言未既微風颯
然輕陰拂然驚五色之晃蕩恍白虹之貫天使人目亂

而欲倒如觀江波之漩而身亦與之回旋楊子懼而呼
客曰月華方明奚驟眩焉紺旻方潔奚忽變焉客曰適
有薄雲莫知所來非北非南不東不西起於極無之中
忽乎明月之依輪囷光怪相薄相蕩而為此也殆紫皇
為之地而風伯為之媒歟楊子釋然曰所謂月暈如蜺
者不在斯乎不在斯乎方詳觀而無厭乃霍然而無見
益月以有雲而隱復以無雲而顯也雲以一風而聚還
以一風而散也楊子若有感焉乃告客曰天下之物孰

非月之暈耶暈之生也其可洗耶暈之消也其可止耶
而天下之士以晉楚之富為無竭以趙孟之貴為有恃
其去則持之而不忍其來則居之而不耻其痴黠何如
也客未對童子請曰人語既寂子盍歸息楊子與客一
笑而作曰今夕何夕見此奇特

木犀花賦

秋氣已末秋日已夕楊子觴客客醉欲出偶雲物之淨
盡吐霽月之半壁楊子鼻觀若有觸焉澹空山之何有

驚妙香之郁然急謂客曰是必有異吾與子盍往觀之
行而求之無物可即也舍而不求又不能自息也天風
徐來其香浩蕩楊子乃凝神而從之忽欣然而獨往蓋
吾履未出於柴門之裏吾身已超於廣寒之上矣水國
湛湛不足以爲其空明而深靚也雪宮皚皚不足以爲
其高寒而迥映也玉堦之前有團其陰蔚乎瑠璃之葉
槭乎琴瑟之音天葩數匝玉匪金細不逾粟香滿天
地蓋向者之所聞乃於茲其良是摩挲玉蟾蜍而問焉

亦不知其名而字之曰桂吾甚愛之欲求其裔將刈其
枝以脩身之玉斧瀾其根于銀河之秋水移之以歸藝
我庭砌羿妃潁然而不悅曰予將白之於帝楊子聳然
而悟月尚未午客亦未去顧而見木犀之始花宛其若
天上之所覩笑而問客曰吾之茲遊夢耶醉耶惘然不
知其處

學林賦

吾友胡英彥取班孟堅序傳之卒章與黃豫章求益牕

下之意命其齋房曰學林誠齋楊某為賦之其辭曰
懿夫學林先生宇宙一室書冊永日江聲山影排戶而
願交詩臞書痴守闕而不出客有念其幽獨者闖然詣
之仰瞻其玄霧之中則垢以銖兩計也俯視其烏皮之
几則埃以分寸量也客意若不釋然者而問先生曰子
奚若是哉痴臞之為奴埃垢之為鄉世與子忘乎子與
世忘耶先生塊然若不聞者徐顧客曰子可與談乎俄
掀眉而奮袖粲玉齒之有光源以開關波以帝皇幽以

天緯焯以人綱勝以虞初之破碎粹以東家之文章初
松風而澗水忽玉磬而金簧客驚而自失曰吾嚮也病
子吾今也敬子子殆近於道者耶不然何癡於今而黠
於古歟何臞於貌而腴於文歟何埃其几而不埃其心
歟何垢其中而不垢其德歟子殆近於道者也雖然子
之幽且遐者吾不能以問子子亦不能以告我也願問
其膚而已吾聞檀栢有鄉不朋不植也玉石有琢不友
不益也今子也十趾之下無百里之歷兩耳之竇無單

辭之獲則子也既絕學乎諒直矣不幾於不羽而翺書
圃不脛而趨聖域哉此吾之所以不惑而不得也先生
曰非竹實林惟書為林今吾百聖之與居羣書之與曹
蓋終日揖遜其間之不暇子猶病吾虛空之逃耶客聞
而悟出而喜謂其人曰吾有聞矣吾有聞矣其人曰子
烏聞此客曰吾聞之學林之叟學林之叟聞之小德之
父小德之父聞之叔皮之子

交難賦

客有問於楊子曰蒙學於羿羿為盡技技在羿則羿安
技在蒙則羿危孟子不罪蒙而罪羿子無疑歟楊子曰
子虛之子不可以問太玄言有托也周子之兄不可以
談夢寐言罔覺也子以為孟子之言無為而作也耶客
曰擇而後友其友端矣交而後擇其盟寒矣且蒙之為
人也薄乎人爾羿何與之盡驪射之傳與否不足道也
羿獨不與交而難之乎楊子曰客知其一未知其二也
昔者孔壬詐堯晝寐誑孔象以愛兄之道來雖舜亦為

之動蓋天之生物有萬其品彼淑慝之不齊造物不能
為之禁閔梟心於鸞喙施旨甘而報予以鳩雖聖哲兮
柰何昇何為兮已甚其或免而或遭惟係幸與不幸且
夫孟子之於樂克誅其舍館之未定今使臯陶而為理
與蘇公而同聽一則訴投師之冤一則責見師之敬羌
臯蘇兮於斯將二罪兮孰訂嗟乎人之生世孰無朋儔
言合則金春而玉應意適則雲凝而風休蓋亦天與之
樂道與之謀也若夫噐之與居駟之與徒思一射之愈

已則反目而相圖如羿者政可哀耳莊周曰求其至此而不得者命也夫其羿之謂乎客笑曰子言則美矣吾則異於子矣惟自今息交以絕游雞肋不足以煩一矢公等皆去吾亦從此逝矣

誠齋集卷四十三

欽定四庫全書薈要卷一萬五千六百二十一

集部

誠齋集卷四十四

宋 楊萬里 撰

賦

糟蟹賦

江西趙漕子直餉糟蟹風味勝絕作此賦以謝之

揚子疇昔之夜夢有異物入我茅屋其背規而黝其臍

小而白以為龜又無尾以為蛙又有足八趾而雙形端
立而旁行唾雜下而成珠臂雙怒而成兵寤而驚焉曰
是何祥也召巫咸卦之遇坤之解曰黃中通理彼其蘊
者歟雷雨作解彼其名者歟蓋海若之黔首馮夷之黃
丁者歟今日之獲不羽不鱗奏刀而玉明披腹而金生
使營糟丘義不獨醒是能納夫子於醉鄉脫夫子於愁
城夫子能親釋其堂阜之縛俎豆於儀狄之朋乎言未
既有自豫章來者部署其徒趨蹌而至矣謁入視之郭

其姓索其字也楊子迎勞之曰汝二涘之裔耶抑九江之系耶松江震澤之珍異海門西湖之風味汝故無恙耶小之為彭越之族大之為子牟之類尚與汝相忘於江湖之上耶於是延之上客酌以大白曰微吾天上之故人誰遣汝慰吾之孤寂客復酌我我復酌客忽乎天高地下之不知又焉知二豪之在側

壓波堂賦

陳晞顏作堂洮湖之上榜以壓波命其友誠齋塾客廬

陵楊某賦之其辭曰

敦復先生宅於洮湖日與湖而居猶以湖為疎乃堂其

涯去湖丈餘蓋城虎牢以逼鄭晉退三舍而子玉不止

者歟一夕波歇鏡底生月忽失洮湖之所在但見萬頃

之平雪先生欣然曰吾又將載吾堂於扁舟對越江妃

之貝闕我芟我裳我葛我巾筆床茶竈瓦盆藤尊左簡

齋之詩右退之之文舟人之櫂一從而先生飄然若秋

空之孤雲矣先生方獨酌濁酒悲吟苦語攬鬚根之霜

搜象外之句管城子褚先生環而攻之麾之未去也有
風颯如有瀾熒如舟人曰浪將作矣夫子其歸乎先生
未及答而小波屋如大波山如龜魚陸梁蛟龍睚眦馮
夷擊鼓而會戰川后鞭車而疾驅渺一葦之浮沒眩秋
毫之有無舟人大恐相顧無色先生投袂而起仰天而
嘆曰吾與洮湖定交久矣而未嘗識此奇觀也子產曰
它日吾見蔑之面而已今見其心請改事湖庶幾歲晚
之斷金

放促織賦

楊子朝食既徹步而圃嬉遙見一二穉子集乎遠華之
堂環焉其若圍俯焉其若窺躡焉其若追也楊子趨而
往視之蓋促織之始生而尚未墜地而未能飛者也嘉
遯而不市故高步而不卑辟穀而不飮故癯貌而不肥
既蚱蜢其脩髯亦翡翠其薄衣彼其臂短而脰甚長是
故將進而趨趄翹立而孤危也楊子笑謂穉子曰汝豈
識之乎是固夫霜淒露感而恤緯征人之裳者歟身勤

心苦而提耳女紅之荒者歟晝間宵嘯自基而徂堂者歟多言強聒身隱而聲彰者歟若悲若怨若憤若嘆而吟歎秋夕之清長者歟奚失據於幽茂而貼身於躡藉若是其幼且孱也乃命穉子藉以羽扇遷之叢間見密葉其躍如曝冬日其欣然穉子反命曰是蟲也若子產之魚圉圉焉洋洋焉矣楊子使穉子反視之至則行矣

雪巢賦

天台林君景思之廬宇以雪巢尤延之為作記廬陵楊

某復賦之其辭曰

赤城兮霞外天台兮雲表有美兮先生相宅兮木杪厭
人寰兮喧卑薄市門兮囂湫壑谷奧潔蝸廬褊小陟彼
懸崖天紳之涯竒峯日拂枯松霄排飛上萬仞之顛旁
無一寸之階我營我巢維條伊枚命黃鵠而銜枝驅玄
鶴而曳柴斧辛夷以為柱刈山桂以為棟蘭橈椒其芬
芳荷蓋爰其不動將旁招樵夫朋盍溪友以落之且有
日其善頌矣夜半風作頓撼林薄天駭地愕山跳海躍

已而寂然四無人聲黯天黑而月落忽入窓之夜明恍
身墮於冰谷羌刮骨其寒生窮猿曾嗥飢鳥獨鳴先生
夙興而視之但見千里一縞羣山失碧翔玉妃以萬舞
飄天葩之六出皓皓的的續續籍籍蓋朔雪十丈乾沒
吾巢而無人跡矣先生舉酒酌曰巢成雪至雪與巢會
式瑤我室式珠我解空無一埃點我勝槩繼自今匪仙
客其勿近匪詩人其勿對乃擣水漿與雪升飲兔鬚於
墨澮大書其楣曰雪巢標俗子出諸大門之外

清虛子此君軒賦

吾友清虛子家有竹軒命曰此君誠齋楊某為之賦曰
客有問於清虛子曰昔者子猷愛竹字之曰此君謂此
君一日之不可無古之知竹者未有若子猷之勤者歟
清虛子曰子猷可謂愛竹矣知竹則未也古之知竹者
其惟吾夫子乎蓋嘗聞之夫子適衛公孫青僕子在淇
園有風動竹聞蕭瑟擅轡之聲欣然忘味三月不肉顧
謂青曰人不肉則瘠不竹則俗汝知之乎其詩曰瞻彼

淇澳菴竹如簣言念君子溫其如玉吾乃今知竹之所
以清武公之所以盛也蓋君子於竹比德焉汝視其節
凜然而孤也所謂直哉史魚邦有道如矢者歟汝視其
貌頎然而臞也所謂伯夷叔齊餓於首陽之下民到於
今稱之者歟汝視其中洞然而虛也所謂回也其庶乎
屢空有若無者歟故古之知竹者其惟夫子乎子猷非
知竹者也客曰甚哉清虛子之言似夫子也敢賀此君
從陳蔡者皆不及門君何脩何飾乃得與四子而同席

乎願堅晚節於歲寒以無忘夫子之德

梅花賦

紹熙四祀惟仲之冬朝暖焉兮似春夕淒其兮以風楊
子平生喜寒而畏熱亦復重裘而厚幪呼濁醪而拍浮
嗔麟定之未紅已而月漏微明雪飛滿空楊子欣然而
嘆曰舉世皆濁滕六獨清舉世皆暗望舒獨明滕也挾
其清而不滂終歲遯乎太陰之庭舒也倚其明而不垢
當晝閱於廣寒之扃蓋工於相避而疑其不相平也今

夕何夕惠然偕來皎連璧之迥映蹇欲逝兮徘徊吾獨
附冷火而撥死灰顧不詒二子之咍乎爰策枯藤爰躡
破屐登萬花川谷之頂飄然若絕弱水而詣蓬萊適羣
仙拉月姊約玉妃讌酣乎中天之臺楊子揖姊與妃而
指羣仙以問焉曰彼縞裙而侍練輓而立者為誰曰玉
皇之長姬也彼翩若驚鴻矯若游龍者為誰曰女仙之
飛瓊也彼膚如凝脂體如束素者為誰曰泣珠之鮫人
也彼肌膚若冰雪焯約若處子者為誰曰藐姑射之山

之神人也其餘萬妃皓皓的光奪人目香襲人魄問
不可徧同馨一色忽一妃起舞而歌曰家大庾兮荒涼
系子真兮南昌逢驛使兮寄遠耿不歸兮故鄉歌罷因
忽不見旦而視之乃吾新植之小梅逢雪月而夜開

海鰲賦

有後序

辛巳之秋金亮侵邊既飲馬於大江欲斷流而投鞭自
江以北號百萬以震擾自江以南無一人而寂然牙斯
抵掌而笑曰吾固知南風之不競今其幕有烏而信焉

指天而言吾其利涉大川乎方將仗三尺以麾徒旅蔽
一江以載旌旛掠木繇估客之艤登長年三老之舡並
進半濟其氣已無江壖矣南望牛渚之磯屹峙七寶之
山一幟特立于彼山顛金亮大喜曰此降幡也敵衆呼
萬歲而賀曰我得天乎言未既蒙衝兩艘夾山之東西
突出於中流矣其始也自行自流乍縱乍收下載大屋
上橫城樓縞於雪山輕於雲毳倏忽往來刻頃萬周有
雙壘之舞波無一人之操舟敵衆指而笑曰此南人之

善幻不木不竹其誑我以楮先生之儔乎不然神為之
楫鬼與之游乎笑未既海鱗萬艘相繼突出而爭雄矣
其迅如風其飛如龍俄有流星如萬石鐘實自蒼穹墜
於波中復躍而起直上半空震為迅雷之隱谷散為重
霧之冥濛人物咫尺而不相辨敵衆大駭而莫知其所
從於是海鱗交馳攪西噪東江水皆沸天色改容衝颿
為之揚沙秋日為之退紅敵之舟楫皆躡藉於海鱗之
腹底吾之戈鋌矢石亂發如雨而橫縱焉不必射人不

必攻隱顯出沒爭入於陽侯之珠宮牙斯匹馬而宵遁
未幾自斃於瓜步之棘叢予嘗行部而過其地聞之漁
叟與樵童欲求牙斯敗衄之處杳不見其遺踪但見倚
天之絕壁下臨月外之千峯草露為霜荻花晚葺紛擢
謳之悲壯雜之以新鬼舊鬼之哀恫因觀蒙衝海鯨於
山趾之河汭再拜勞苦其戰功惜其未封以下瀨之社
侯冊以伏波之武公抑聞之曰在德不在險善始必善
終吾國其勿恃此險而以仁政為甲兵以人材為河山

以民心為垣墉也乎

右采石戰艦曰蒙衝大而雄曰海鰭小而駛其上為城堞屋壁皆堊之紹興辛巳金亮至江北掠民船指麾其衆欲濟我舟伏於七寶山後令曰旗舉則出江先使一騎偃旗於山之頂伺其半濟忽山上卓立一旗舟師自山下河中兩旁突出大江人在舟中踏車以行船但見舟行如飛而不見有人敵以為紙船也舟中忽發一霹

霍礮蓋以紙為之而實之以石灰硫黃礮自空而下落水中硫黃得水而火作自水跳出其聲如雷紙裂而石灰散為烟霧瞋其人馬之目人物不相見吾舟馳之壓敵舟人馬皆溺遂大敗之云

後蟹賦

昔趙子直漕江西餉予糟蟹因為賦之江西蔡帥定夫復餉生蟹風味十倍曹丕再為賦之

司徒道明來自洛師至止江湄逢一湖海之仙貌肖乎
晉之解揚而其怒有赫骨像乎漢之彭越而其園中規
獨愛其二執戈者前矣視其趾二四而有跂意以為吳
中介士郭先生也不知其姓則彭其字則蜚也亟攜其
手而上曰吾自渡江以來取友不少矣如孔之金如王
之瓊吾皆得而友朋如魏之玉如庾之穀吾皆得而款
曲夫子安在何相見之暮而不夙也於是齒牙嗜焉胃
懷寄焉與之一飲一食而同醉焉夜半客起若有所刺

者司徒腹心岑若有所崇者詰朝下逐客之令屏之陽
侯之遐裔焉他日以天子之命作牧於豫章幕府初開
遙見俊良望見一客又似乎彭越與解揚命典謁曰是
嘗崇我而幾我傷者矣予不汝殺世無黃祖其生致之
於是溯江而上之楊子楊子方晚飲聞其至揖而進之
曰吾有二友惟彼麴生與爾郭索老夫與之同死生不
減顏氏子之樂彼也日從予游爾也久於云邈何相忘
江湖莫我肯顧也何使我清風明月必思玄度也爾之

德吾能言之洗手奉職德之上也就湯割烹德之次也
鋪靈均之糴卧吏部之甕德斯為下矣客於是涕唾流
沫園視而顰謝曰士固有以贗亂真以遠間親聖而受
圍肖乎形也孝而投杼同乎名也僕之主公昔以彭為
郭今以郭為彭不遇蔡司徒幸遇揚子雲願借先生蒼
頡之篇與太玄後引之文詳註爾雅彭郭之異族庶解
嘲於司徒之門

誠齋集卷四十四

欽定四庫全書薈要卷一萬五千六百二十二

集部

誠齋集卷四十五

宋 楊萬里 撰

辭

張丞相詠歸亭詞二首

湘之山兮幽幽湘之水兮舒舒我來兮桂之陽春聿云
暮兮上下綠淨而交如鳥鳴兮花乾彼湘之人士兮詠
遊而魚魚長者兮矩步童子玉雪兮趨亦趨挾策兮抱

琴若將遊兮物之初埜風兮修修吹萬而不可執兮所
過而數腴長者顧謂童子曰快哉此風吾為汝援琴而
歌之歌曰滄浪兮濯纓風涼兮舞雩微德人兮焉歸以
斯道兮金玉予欲問津兮沂之水其則不遠兮又焉知
湘江之非歟

蒹蘭圃兮沼芙蓉有美君子兮何斯其燕居乎尹兮袖
間陞白虹兮斗之虛章甫兮深衣御風騎氣而天游兮
與造化而為徒獨立萬物之表兮室邇而人甚遠山立

而淵觀兮道德燕及乎蟲魚韋編兮在手隱几而卧兮
夢一丈夫首肯乎尼山兮河其目莞爾而笑兮告予以
下學而上達知我者其天乎忽寤兮四顧歎乃一聲兮
亭之西隅

和張敬夫望月詞

敬夫示往歲五月詠歸亭侍坐大丞相望月詞
予以辛巳二月既望夜歸讀書於誠齋甲夜漏
未盡二刻月出於東山清光入窻欣然感和

之

玉蟲暈以貫虹兮學林之顛閭其宵兮聖賢畢叅於前
心超兮千載忽乎納自牖兮光寒而靜娟吾興視兮何
祥望舒推轂兮麟大園生兩儀兮虛白飾萬物兮清妍
彼何居兮轆茲挈一規兮破幽偏代天兮宣精捥歆兮
惡盈似道兮日損縮於一晦弦兮萬斯年而求伸宅天
下兮至晦鏡天下兮至明燭吾心中之月兮貫地緯而
洞天經吾奉月兮周旋月踵吾兮後先夫君寄我兮三

章招月而與寓目兮炯筆勢之翩翩想它日之獨立兮
過庭而侍側誰其耳剽於玉振兮惟此月知其然月不
予留兮予亦詠而歸歌三終兮謝明月何夕復惠然兮
臨我於亭乎而

延陵懷古

予假守延陵蓋州來季子之墟也迨暇登城游
目四顧慨然想見季子之風烈既而問諸故老
古今之士或邑於斯或寓於斯者得三人焉作

延陵懷古詞

延陵季子

荆之溪兮澹以幽惠之山兮雲侔思君子兮不見莽草
樹兮脩脩面勾吳兮東坐背朱方兮北卧齊楚豈不强
而大兮吾王以妥賢於國其無裨兮不曰季子存而吳
賀彼懵者之變言兮謂兆亡於讓王弗丕承於考心兮
用永五湖之與三江祀太伯其忽諸兮顧襲譽於子臧
曾不知民無讓而不立兮自古皆有亡諷此岵與鋤箕

兮疇莫知其重輕若干乘暨簞豆兮潔豐約而則明迨
躬逢而利怵兮亦幾何而靡爭謂吾札之不懿兮札亦
恬受而茹聲復思兮君子乾坤毀而日月息兮則君子
之亦死

蘭陵公

密雲兮終風健順閉兮罔寸蹊之通喟葵丘踐土而迹
熄兮矧冀方岐山之與逢單崇谿以鑄兵兮靡遺蒲於
董澤燕簾無趾而造齊廟兮楚眈而秦其魄鬪六王於

一說兮微儀行之舌而不國嗟若先生兮雞知時之不
如儲唐虞之故冕兮鬻洙泗之敝裾乘方輪而折軸兮
欲先鞭而疾驅豈不家捐而人棄兮載之萬世之亨衢
繫素王兮中都若蘭陵兮聖之徒征九伯而佩六印兮
晞二邑哉而不得俱倘不欲以天球玉磬而貿康瓠兮
嗟爾後死者其舍諸

東坡先生

吹赤壁之月遂兮瞻黃州之雪堂彈湘妃之玉瑟兮織

天孫之錦裳招先生其來歸兮何必歸眉山之故鄉歷
九州而猶隘兮誕寘之祝融之汪酌乳泉以當醴兮餐
荔子以為糧葺榕葉以作屋兮託枕椰之蔭以為裳驅
海濤以入硯滴兮挽南斗文星於筆鉞昌黎兮歐陽視
先生兮雁行韞不洩兮忠憤炯不泯兮文章乞鏡湖兮
九關營菟裘兮是邦予之來兮云暮與先生兮相望視
履跡兮焉在問故宮兮就荒俯仰兮永懷渺山川兮蒼
蒼

跋李允蹈思故山賦辭

允蹈月岩先生
方叔之曾孫也

月岩含章兮噫孰貫之璜兮噫逋不其償兮噫眉山之
下兮噫既億其價兮噫胡漏於罅兮噫顙於眉山兮噫
山顙於天兮噫天感其顙兮噫有斐孫子兮噫花枝秀
啟兮噫烈祖是似兮噫筆似其鋒兮噫骨似其窮兮噫
爾詞則古今噫爾騷則楚兮噫爾璞孰剖兮噫招招巫
咸兮噫有筭爾占兮噫曷焯爾潛兮噫曷窅不濟兮噫
曷部不賁兮噫吽初笑既兮噫

和淵明歸去來兮辭

予倦游半生思歸不得紹熙壬子予年六十有六自江東漕司移病自免蒙恩守贛病不能赴因和歸去來兮辭以自慰其辭曰

歸去來兮平生懷歸今得歸有未歸而不憚豈當憚而更悲媿一陶之不若庶二疎兮可追肖令威之歸遼喟物是而人非捐水蒼兮今佩反芰製兮昨衣戀豈諼夫太紫分敢踰於少微如鹿得草望綠斯奔如鶴出籠豈

復入門屢雖未得而趾故存謂予不信有如太蹲月喜
予之言歸隤清輝而照顏山喜予以出迎相勞苦其平
安江喜予而舞波繫碎雪於雲關紛隣曲之老穉羌堵
牆以來觀沸里巷之犬雞亦喜翁之蚤還驚鬢髯之兩
霜尚赳赳而桓桓歸去來兮半天下以倦游飢予驅而
予出奚俟飽而無求觀一簞之屢空躬自樂而人憂暨
一區之草玄娛義畫與箕疇豈慕胥靡濟川作舟矧先
人之敝廬有一壑兮一丘後千尋兮茂林前十里兮清

流耿靡羨而截營蹇何驚而不休已矣乎用舍匪吾行
止匪時何至啜醢如漁父何必誓墓如義之吾行可枉
塗吾止可預期應耘耔而端委猶端委而耘耔對天地
而一哂酢風光以千詩抵槁莖與朽穀豈復從詹尹而
決疑

黃世永哀辭

乾道己酉秋七月予因謁鄉先生武岡使君羅公公曰
子之友黃世永者死矣世永之父元授得州南雄六月

某日世永自行都侍南雄公西歸至貴溪逆旅南雄公疾不起後一日世永亦卒或曰皆暍也或曰世永毀也予聞之心折泣且疑後月餘得中書舍人周公子充與友生胡季永書與武岡公之言不異於是哭之盡哀世永名文昌南豐人自其祖至世永三世策進士第而世永策第時年最少蓋生二十有一也初主贛之贛縣簿予時為州戶掾予之來去後於世永者一年而為寮者三年一見即定交世永之高遠深博者予不能竟也其

學以不愧屋漏為宗於文無所不能無所不工嘻笑立
成而不似立成者也予每往觀其政則見老稚叢於堂
莫見世永也披而入則世永執筆決遣如飛前者未出
後者入夜分乃已世永不煩民亦不咨吏亦不欺初以
為世永勤且嚴然旋觀三年如初之觀竟不見其呵一
民咎一吏勤者亦懈嚴者亦窮矣世永果勤且嚴者耶
紹興戊寅三月世永白太守去出城五十里不得行田
里之民環而止之者數十百人曰主簿去我我不可生

矣相與執輿折山花以簪世永持濁醪以觴世永而其
父老五六十人疾走贛之憲臺列辭以乞留司憲御史
黃公無以遣則好謂之曰汝不愛黃主簿乎皆怒曰否
曰留而塞與去而通孰愛孰不愛也乃皆曰然不得已
泣而散予時親見此事以為今之守令罷則先期戒吏
民以卧其轍此足榮不足榮耶以今之欺而謂古皆然
若世永於贛之民乃有此古之所書卧轍云者久矣乎
使予之不信也使予無所不信於古之云者世永哉雖

然予於世永之事親見者也古之書者又不知其親見
否耶未幾浙水西部使者邵公辟世永秀州崇德縣令
時某令者待崇德次三年以適及期而辟書下世永抗
章力辭士大夫義之或者曰矯也見義則不懦於避見
利則勇於不避此或者之所賢也世永得辭其矯哉世
永在都下未調勢家子有階中人得法從者臺諫相視
不怪世永袖文書謁御史朱其姓者責以天下公議御
史怒未有以發也會中書舍人張公安國聞世永之風

而悅之曰天下乃有此士即荐於朝得召世永辭焉而御史亦言於光堯曰黃某沽名躁進世永自是偃蹇江淮間今上之二年冬十二月以人望起故大丞相魏國張公於督府而再相之公至首薦世永授樞密院編修官未赴公為羣小擠去而世永亦復論罷今二年矣而遂死耶嗟乎哀哉世永年止三十有八而官止左從政郎而其立已如此遐其年享其位以訖其施其立何如哉雖然壽且貴而莫之有立有立而莫之壽且貴使

世永自擇宜何擇也然則世永可無憾矣而予猶哀之
耶嗟乎才珍於天而捐於人厚一邑而薄天下吾意當
世君子之用心不宜有此也不宜有而有焉則予之哀
獨為吾世永哉乃書以寄其子樞而為之辭曰

聖門際天而不可逕兮子聚糧以疾趨古文熄而哇鄭
兮子獨返而雅諸衆皆賞其襮而遺其裏兮知全者不
在予仕者謂顓民之囂兮不啻沫邦之夫何子之仁以
蒞兮若膝下之乳雛予惟子之規兮則未知封屋之迂

沐猴勇而罔覲兮子髮上而衡盱舍已躁進而謂子躁
進兮宜不曰沽名之非愚世切齒於彼之晚實兮流涕
於子之不晚殂庸知天之不予祉兮不厚彼之辜惟師
友之恩紀兮一飯而九其吁天不予槩而奪予朋兮半
其濟而亡軀決汝漢而東之兮曾足為予泪之餘若子
之死而不死兮不亦名星日而骨幽墟

曾叔謙哀辭

故興安縣令曾君諱敏恭字叔謙韞韜瓌材不祿不鬻

竟不用世中壽而逝其名實爵里謝昌國既銘之里人
楊某復誄以哀辭曰

歲紹興之壬午兮余負丞於零陵泊夫君之南征兮臨
二松之寒廳聞楚然於逃虛兮辭未接而情親分一日
之光景兮載鴟夷乎吾與行沛吾擊其蘭橈兮亂湘流
以揚舲維予竿於愚溪兮叩柳子之柴荆陟西山以茹
芳兮降鈇鉞以漱冷風吹衣以拂雲兮舉手攬乎南斗
之星君與我其俱醉兮夜解手於丘亭余未幾而北歸

兮君忽返乎銘旌曾合離而俛仰兮奄古今乎死生羌
夫君之淵偉兮允江山之載英蔚豫章之離奇兮森
梗梓其崢嶸自拱把而培溉兮俟百圍乎千尋萃雪山
與氷谷兮凜霜影而雨聲細猶堪於薄櫨兮豈大者之
不可采仰神臯於太紫兮矩厚載而規園清屹建章以
亘明光兮連蕙草與蘭林詔班爾以駿奔兮旁搜岩岨
之歆傾締皇居及帝室兮將消休乎落吾成蹊棟榦槁
乾於空山兮匠不獲以督繩紛后皇之偃材兮堅何幽

之不徵喟一擷而萬指兮夫孰有遭而無營君方舍斯
世而去之兮豈達欣而窮憎耿精爽之未泯兮嗤彼啄
腐而吞腥裁斯文以寄哀兮聊復寫久要平生之情

范女哀辭

石湖先生叅政范公有愛女名某字某嫻德淑茂年十
有七紹興壬子五月從公汎舟之官當塗至公舍得疾
旬日而逝公哀痛不自制八月命其同年生誠齋塾客
楊某作辭以哀之曰

有齊石湖之季女兮肇俊茂而青蔥蘭茁芽以芬播兮
玉在璞而光融茹采蘋以為粢兮築內則為之宮樂彤
管以俶載兮逝將眇青竹而論功製菡萏以為裙兮謁
之以秋江之芙蓉紛蕙纓而菊佩兮豈江蓠揭車之與
縫掇衰丈之朔雪以澡德兮襲萬壑之清冰而在躬耿
吾獨傳中郎之素業兮豈曰矜蕭然林下之風沛吾藥
乎桂舟中兮無小無大焉從吾公何若而人之不淑兮
奄一疾而長終忍舍蘭陔之孝養兮莽玉女宓妃之與

從父曰嗟予膳之孰視兮母曰嗟予命之疇同盡兩親
之哀潛兮遺九宗之長恫蹇石湖之慟而莫之釋兮小
極而隱幾乎書之叢夢漂漂而行遠兮求吾兒乎四方
上下之青穹杳碧海之際天兮歸三山之倚空蓬萊方
丈之攸宅兮浮金宮銀闕之崇崇若有人乎山之阿兮
飛騰往來而不可逢羌可逢而不可執兮若迫映乎復
腫朧摘玉李而弄金波兮遨嬉乎倒景有無之鴻濛忽
臨睨乎舊鄉兮望見石湖之仙翁泣初眊而後哂兮喟

吾翁乎奚忉忉繫天地萬物之逆旅兮兒與翁父子適
相值於逆旅之中汨倏合而忽分兮邈千變萬化而何
窮淬割愁之劍而不滿一呷兮非我翁春日攬鏡大篇
之春容翁顧笑而驚寤兮皦寒日其生於東

悼雙珍辭

傳口劉光宗字廷瑞弟紹宗字廷碩受伏生尚書經明
行脩文詞蔚然年三十餘一病旬時相繼而逝誠齋塾
客楊萬里惜其才悼其不幸短命作辭以哀之命曰悼

雙珍云其辭曰

有傳者頌兮有玄者潭
翠乎瓊臺與玉堂兮天垂光而
蔚藍寶襪下幡乎九淵兮瓊彩上絢乎千岩
羌磅礴醪輶而不滴兮耿虹貫乎晴嵐
劬玉衡之望氣兮九載旭考而宵參
曰西江之軫墟兮孕雙珍乎泥之潛
匪珠胎之雙止兮則穀玉其美
蕪帝令雷公以持斧兮勅陽侯以發
函逝將脩貢於玉府兮旅清廟而爾
瞻夫何夔魑猶狂之予妬兮肆為伯
強之讒蹇訴帝以不好兮未聽

六丁之窮探飛巨石以載震兮洵怒濤以有嚴連壁毀
於石韞兮雙珠裂於波涵卞和慟以叫帝閭兮隋侯泣
以衣沾帝亦悲傷而末如之何兮磔不若魑魅而不厭
安得雙珍之再芒兮過映乎西江之北南

有宋死孝毛子仁哀辭

子仁諱洵吉之吉水人也年十九第進士年二十六中
拔萃制科杜祁公有詩美之其文集亦有詩寄歐陽公
父母之喪廬墓死焉時年三十二天子賻之粟帛以旌

其孝書在國史後百有餘歲邑人楊萬里讀其文集作
辭以哀之其辭曰

顓穹睠宋方邳隆些篤生仁皇寔睿聰些二堯兩舜復
時雍些杜韓富范再夔龍些魏蕩奮熙起丕功些歐陽
伯仲軻與雄些雲昭漢回炳文風些磨在靈囿鳳在桐
些金芝傳車朱草鼓些懸藜結綠紫紫宮些靈蛇照乘
玉府充些大江之西文江東些毛伯苗裔河嶽鍾些三
辰五緯韞心胷些漢室賈生與終童些年未弱冠收科

崇些連收制科天動容些玉映漢臺驚羣公些棄官如
泥子職恭些死孝倚廬神明通些文行有煒垂無窮些
與宋一經相始終些凍黎百年養萬鍾些草腐菌朽花
實空些有宋孝子尉岱嵩些

操

趙平甫幽居八操

筠居操

公子誅茅不木不土此君惠然聿來胥宇

我娛齋操

一室容膝納萬壑而有餘一几凝塵載千古而不重暮
四朝三吾不復夢

醉石操

望之溫其玉即之寒於冰一飲五斗一石解醒衆人皆
醉石獨醒

竹齋操

客來何聞客去何嗔左右前後惟此君德不孤必有鄰

北窻操

一枕之甘萬戶不願清風之快萬玉不價為我謝避俗
翁誰在羲皇之下

梅亭操

竹屋夜明色竹戶夜寒聲幽人含瑟而起視香通國而
白連城梅耶雪乎四問而四不應

碁臺操

爭名不充則朝者嘻爭利不贏則市者吁君子無所爭

必也奕乎

龜潭操

風者其武波赫斯怒油然者淵未遽如許



誠齋集卷四十五

謹案卷四十二第一頁前七行吾家子曾子按家

疑當作鄉

第一頁後一行告子閔靈龜按子疑當作予

第二頁前五行今身胡姓前身黃原本姓訛然据

別本改

第五頁前六行豈惜青黃飾原本飾訛色與上韻

復据別本改

第十三頁後四行天教書院名自起按自一作日

第十四頁前七行頻着穠藍醜紫中原本紫訛酒
据別本改

第十八頁前四行望郎舊說為邑宰原本郎訛陽
今改

卷四十四第三頁後五行嘉邈而不市按賦彙市
作仕

卷四十五第六頁後三行緊碎雪於雲闌原本闌
訛間按陶辭無間字韻今据改

總校官庶吉士臣張能照

校對官庶吉士臣陳墉

謄錄監生臣浦焞

謄錄貢生臣張健

欽定四庫全書叢要

集部

誠齋集卷四十六至五十



詳校官助教臣謝登雋

欽定四庫全書薈要卷一萬五千六百二十三

集部

誠齋集卷四十六

宋 楊萬里 撰

謝賜御書表

聖訓馭臣用勵廉勤之操宸章逮下無遺踈遠之邦寶
軸壁連薦紳風動臣某中謝竊以湯陳六事儆有位之
苞苴成正百官董攸司之功業惟今明詔兼善古王恭



惟皇帝陛下生德自天以躬率下體乾之健樂勤勞而
不疲酌損之脩自奉養而有節尚虞中外或徂懦貪爰
肆筆以成書示吐辭而為法俾彼雲漢煥乎文章善者
祇師丕承謨訓之告姦邪震虢知懼春秋之嚴臣敢不
惟暨乃僚對揚休命戴星愛日忍為視蔭之媮嚙雪飲
冰勉企拔葵之潔

代賀立皇太子表

聖謨經遠永圖宗社之休上嗣正名懋建元良之重告

於太室對越昊穹臣某中賀竊以離兩而明大人麗乎
繼照震一而索長子體夫浚雷上際緝熙之朝肇稱久
大之業恭惟皇帝陛下光昭先烈啟佑燕謀出獨斷於
宸衷舉縟儀於儲禁東序舞籥愛舉四時之宜西學尚
賢燕兼三代之禮臣遠將隆指阻造大廷長發其祥載
歌濬哲之頌少成若性願獻治安之書

代賀會慶節表

繼明以照大一統以維新彌月為良於萬年而鼎盛暨

於海表罔不嵩呼臣某中賀竊以天於太平為時而生
乃聖民思長治俾壽以祝其君三靈交歸諸福同永恭
惟皇帝陛下由仁如舜立武惟宣化日自舒安取再中
之異帝齡所與更昭二聖之同臣遠服委輸欣逢慶賴
却金鑑之獻既無路以效珍想鈎砌之崇惟望雲而舞
手

代福建憲何德獻謝到任表

七閩深秀地望匪輕庶獄平亭人命所寄大恩驟至小

已莫勝即受命以首塗既入疆而問俗見民鼓舞為言
天子之聖神聞臣布宣更感詔音之仁厚皆相規而遠
罪其忍負於好生臣某中謝伏念臣才則非長用將安
取策十駕之蹇寧不願於先鞭試一割之能了蔑聞於
餘刃一盼郡紱再領使輶頃師干之濯征遴使指而給
饗豈其乏使以飛輓而委臣迨此當暮未譴呵而已幸
敢謂繼明之始亟叨布憲之除茲益伏遇皇帝陛下
乃聖天同於民子視約三章以示之禁不曰尚威俾萬

姓之興於仁其歸去殺夫何淺陋亦詭奉承臣敢不務
在盡心戒於留獄必使人之無訟雖則未能得其情而
則矜庶乎自竭

代宰相賀雪表

神功所格冬大雪以應期天意謂何年屢豐而表瑞吉
之先見序則不愆臣某中賀恭惟皇帝陛下乾以君之
聖之時者日月所會臨地統於三正造化為工調天範
之六出知麥禾之有望舉稚耄以載欣臣遭世泰和罔

功變理驗時寒之若端自聖謀懷履薄之如敢忘臣節
知常州謝到任表

承流閩徼初叨江海之麾易地浙西忽畀股肱之郡分
顧憂而益重豈薄陋之克堪臣某中謝伏念臣嗜古成
迂信書故退頊從山水之縣入陪鵷鷺之班心乎愛君
而直前慨然遇事而妄發非聖明之全度則孤拙之疾
顛尋將母以告歸乃拜州而得請玉色臨遣金聲撫柔
憩公幹漳濱之身三年於外易獨孤常州之任再命茲

榮敢謂戴盆而望天今復舉頭而見日茲益伏遇皇帝
陛下纂堯乃武蹈舜斯仁道在太極之先不居其聖明
見萬里之外以臨斯民咨諏慈惠之師布宣寬大之詔
顧捐輔郡以詭下臣臣敢不既竭駑才底綏結服惟郡
邑先惠養之治所願盡心使田里無愁恨之聲庶乎報
上

謝降官表

奉詔弗莊宜抵誅而萬坐征商失察止貶秩之兩階戴

天斯仁踏地無所臣某誠惶誠懼稽首頓首伏念臣受
才不敏馭下太疎乘障無循良之稱已孤任使所部有
愆違之屬乃罔聞知方肇布於紬書俾緩征於行旅夫
何下邑之近如彼監河之官公違溫言私越坐所事從
其長蓋厥咎之有歸罪疑惟輕豈始望之及此茲蓋伏
遇皇帝陛下惟堯濟衆如舜好生雖離明之照四方何
幽不燭然乾元之利萬物所覆無殊曾是卑微曠然怙
冒臣敢不往欽厥訓茲率乃僚仰體成湯儆官刑於有

位願學孟子疾龍斷之賤夫

廣東提舉謝到任表

守延陵季子之墟媿無治行使南粵尉佗之境復拜恩
言戴仁如天反已惟谷臣某中謝伏念臣學非世用才
不人先幼而讀書亦竊探壁中之科斗長而試吏願安
知柱後之惠文三年朝班再歲輔郡進則思砥礪於名
誼退則守布宣於詔條訖無涓埃小補河嶽九天曉日
念孤身將遠於長安四乘秋風忽寵命載驅於原隰至

於南海保彼東方惟所部十有四州去修門四千餘里
物衆地大壤沃泉甘臣始入疆告厥父老上不忘遠翕
然懽呼海若祝融彈壓波瀾之險朔雲邊雪驅除江嶺
之氛暨於幽遐罔弗嘉靖臣以使事官於海邦煥乎榮
光展也徼福茲益伏遇皇帝陛下丕釐駿命怙冒含生
日月宣精照朔南而不隔乾坤有造均雨露以無偏曾
是薄材俾將隆指臣敢不輯寧凋瘵拔去姦貪出納有
司豈但欲委積茗醯之滋殖澄清當路庶幾使豺狼狐

狸之一空

謝除直秘閣表

在疾餘生延及外除之制拜嘉光命有聯中秘之班曷
云枯槁之蹤曾是深嚴之夢寵榮所被祇懼靡寧臣某
中謝伏念臣無用世之才有負俗之累癡不足以事
其拙宜然成或出於因人何力之有頃播刑於百粵偶
奔命於羣蠻奉天威而有行繫廟算之是稟遂令醜類
罔不殄殲矧帥臣鞏湘指縱之謀抑將臣張喜觀獲之

力景風若僭汗雨其滂雲近蓬萊遙集西崑之羣玉霧
浮金篆仰窺東壁之三星施則不害受之何詞茲蓋伏
遇皇帝陛下其仁天若乃武雷行清渤澥之波瀾于誰
奸命賣潢池之刀劍奚足論功曾不遐遺式昭遠馭臣
敢不丕承天寵允答帝暉包以虎皮雖則干戈之偃褭
之馬革無忘肝腦之捐

知筠州謝到任表

需章旬外退以其私便郡疏恩過於自擇地與期而俱

近感及喜以來并不勞載驅已抵所治臣某中謝伏念
臣學問將落行能無稱巖居川觀施諸時而莫可草畊
木茹願其外以奚為際熙運之休明彙羣才而登進再
收遠跡誕寘周行念父教之忠云既勞而後食然身其
餘幾如未老而先衰兒女滿前昏嫁未畢方抒情而地
躋忽從欲以天矜海上仙山隔蓬萊於弱水江西道院
製菡萏於劍池仰惟君父之恩何有中外之間茲蓋伏
遇皇帝陛下立心咸五侔德疇三若予厚下之仁怙冒

率土咨汝宅生之吏惠鮮小民無愛珪符下逮樗櫟臣
敢不祇若德意宏敷詔條令修庭戶之間所先豈弟民
和隴畝之上茲謂荅揚

賀紹熙皇帝登極表

帝出乎震雷動風從龍飛在天雲行雨施乾坤再開日
月重光臣某中賀竊以王纘帝帝纘皇相承自昔堯授
舜舜授禹復見於今聚三聖於一家冠百王而獨步恭
惟皇帝陛下聰文作睿統運集躬育德東朝元良正於

萬國繼離南面大人照於四方歷稽前朝疇若我宋蔚
後先其相望凜揖遜以彌高文祖文孫肇紹興之景命
是父是子受乾道之丕基天人交歸年世方永臣近辭
儲隸遠守侯藩鸞鳳冲霄夙欣攀附之久鴻鵠橫海敢
言調護之勤

賀壽皇聖帝傳位表

立愛惟親結戀東朝之養傳歸於子辭居南面之尊玉
音渙揚鼎象安妥臣某中賀恭惟至尊壽皇聖帝陛下

循堯乃聖命禹厥中謂天下解憂未若綵衣之戲俾壽
母燕喜遂輕黃屋之心當崑崙渤澥之大寧釋璿璣玉
衡之庶政親挈神器付畀嗣君王假一家世授三聖珍
臺瑤館儲恩太寧之穆清夕膳晨羞允恭長樂之定省
抱槩創見結繩未聞臣身遠帝暉心藏天顧五十而慕
更加大舜之年八千為春願效華封之祝

賀至尊壽皇聖帝受尊號表

為天子之父尊之至以何加得大德之名道之高而無

象發於嗣聖酌彼民言臣某中賀竊以商云甚武之王
固非自伐漢曰太平之帝孰以為宜雖聖愚之不侔豈
稱謂之母我恭惟至尊壽皇聖帝陛下視古無遜與天
為徒夏清冬溫欲躬曾閔事母之敬朝政夕令遂託堯
舜倦勤之辭既脫屣以甚輕視鴻號而不屑然壽為五
福之首而聖則萬善之元二者何先兼此而有牒鍾白
玉宜冠以至尊之稱日射黃金更勝以重華之目於赫
鉅麗用光前聞臣身留遐方目擊盛事有虞二典未必

如今日之兼隆作宋一經顧可料諸儒之乏使

賀皇帝奉上壽皇壽成尊號表

御天有俶首勤萬乘之尊熙號維新丕顯二親之懿書
厥愛敬通於神明臣某中賀恭惟皇帝陛下聖德無加
皇猷允塞乃命以位方當系統接緒之初欲報之恩有
在侍膳問安之外踐熙春之和暢奉大冊之烈光有父
之尊有母之親用欽崇於嘉慶謂天蓋高謂地蓋厚極
擬議於鴻名掩竹帛之所書亘開闢而未睹三宮相望

萬福攸同臣屬以守符邈在外服振鷺于下雖莫綴在
廷之班倉庚鳴春或能詠太平之賦

賀紹熙皇帝冊立皇后表

歷服初元天臨諸夏家邦內助冊拜長秋慶先宮闈驩
浹寰宇臣某中賀竊以乾健坤順一氣密運於二儀日
光月明萬物仰瞻於兩曜惟帝及后若陽與陰美教則
人倫明正家而天下定恭惟皇帝陛下修己以敬化民
以躬王業艱難念久同於勞佚慈親定省復多歷於晨

昏既六龍之御天宜四星之正位表儀中禁憐載函生
惟內有闕鴟鵂巢之風則外有無逸立政之治臣名在
儲隸迹非遠臣恭儉服澣濯之衣已相觀而身履夙夜
有警戒之道豈小補於君尊

賀壽皇立紹熙皇后表

大君有命屬元子而宅中

闕

而言委冢嬪而治內正

始周密詒謀深長臣某中賀恭惟至尊壽皇聖帝陛下
至誠如神游心於澹謂養以天下何如釋位以事親而

對於嗣君自有同德而作合付以家國夫何顧憂長發
其祥不顯亦世臣珪符有守觀闕惟懷望穆穆之清光
遠而無極舉欣欣而喜色樂且有儀

誠齋集卷四十六

欽定四庫全書薈要卷一萬五千六百二十四

集部

誠齋集卷四十七

宋 楊萬里 撰

表

謝復直秘閣表

守地云何茂外庸之善狀自天有隕復中秘之榮名敢
云舊物之及躬允出新君之加惠臣某中謝伏念臣少
也狷介老而頓頑非不知與世而同波明哲無忤既未

能枉道以合轍退休則宜託民社以西征寢山林之幽
屏聖人復起品物咸亨覆載無私豈獨軫遺簪之舊日
月所照亦何有覆盆之偏茲益伏遇皇帝陛下泰階清
明德澤洋溢十行一札雷厲風飛四海九川陽開陰閉
展如孤遠與彼昭蘇臣敢不仰戴寵光策磨衰病假以
歲月畢輸宣布之勤歸於丘園於樂隆平之化

謝宮寮轉兩官表

御天介賚已增一秩之優儲肆廣恩亟拜兩階之寵邦

榮狎至心震靡寧臣某中謝伏念臣生而一寒仕亦三
已晚際乾坤之真主獲依日月之末光當高鴻橫海之
秋臣幸陪於羽翼及飛龍在天之旦臣自隔於風雲夫
何皇極之尊尚記承華之舊翦焉孤介緣此榮懷冒之
則無翊運之勲遜之則為異衆之行曹衛偕命既並受
於王朝黃綺終辭敢獨違於君子茲蓋伏遇皇帝陛下
唯天為大如日之升鳳已冲霄未遽忘攀附之雅蛇斯
入宇不遐棄微賤之畸臣敢不載丹乃心益素其履雖

夕曛已迫寢收畊釣之餘生然朝露未先不疾靡捐之
義死

進和御製進士復詩狀表

鈞天廣樂秩有踐之初筵雲漢為章賁思皇之多士湛
恩至渥隆禮惟新臣某中謝恭惟皇帝陛下樂育英才
旁招俊乂君子有酒多且旨間以笙鏞聖人之言遠如
天寫之琬琰情文雙止懷感萬斯臣等典校簡編均霑
慈惠慶霄在上與彼昭回之光儒館獻歌敬修賡載之

職

謝御寶封回自劾狀表

需章再瀆力請祝釐之官聖筆游盼俾安典校之職歸
然恩重沱若涕零臣某中謝伏念臣行能空虛經術淺
薄山哦浦咏未開華國之文蟹躁螳剛烏識立朝之體
屬緣撰述之拙自列投劾之辭蒙天日之龍光煥雷風
而響荅惟君父待小臣之禮前此所無舉搢紳皆拭目
而觀盛時創見誰謂衰朽所能克堪茲蓋伏遇皇帝陛

下乾覆博臨離明洞照憐臣老而幸會親逢賓日之清
明知臣埜而朴忠未聽客星之漁釣臣迫於成命恪所
居官危跡難安少緩東門之車馬踰時申控終采南山
之蕨薇

江東運副謝到任表

依日瀛洲訖無補報觀風江渚遠有光華職超七閤之
先境入六朝之勝麗洪所被繇薄何堪臣某中謝伏念
臣資未有奇學亦寡要蚤粗聞於先哲恥墮在於凡民

學之而欲行之每懷徇國老矣無能為矣非曰忘君屬
緣婚嫁之逼人輒控封章而丐外自天從欲將指于征
爰陞華於小龍俾給餉於流馬篆金浮壁仰淳化之寶
書吹玉連檣下陪京之水漕茲益伏遇皇帝陛下丕承
舜授廣運禹思居九重之覲深所憂民瘼擇十道之採
訪以布寬條夫何衰遲亦在臨遣臣敢不慰彼黎庶周
爰諮諏九郡旱乾要令鴻雁之集百吏清濁當謹羊狼
之分既竭歲時之宣勞終祈田里之歸老

辭免贛州得祠進職謝表

謝病摧頽尚賦珍臺之餽屬文論譔復超延閣之班上
無棄人下則徼福臣某中謝伏念臣老不事事才非奇
奇三聖旁招蚤附鷺廷之數初潛豫附晚叅鶴禁之僚
方衆賢依乘風雲之秋乃微臣僵卧山林之日把麾江
海此朝士之榮光麗日崆峒亦詩人之佳郡矧席過家
之寵曾微待次之淹夫何右臂之偏枯虛辱左符之重
寄陳力就列不能者止投閒置散乃分之宜籲天以聞

伏地以俟閔勞均佚仁不遐遺進律示褒禮亦異數茲
益伏遇皇帝陛下篤茲故舊惠是罷癘軫少原之遺簪
是將厚俗存子方之老馬非取長塗而臣蕭然卧疴行
矣歸休燭青藜而談古豈復與英俊游立白茅而祝釐
尚能使聖人壽

謝除特授煥章閣待制表

竹宮望祭游綴奉宣之司松殿通班復塵持橐之選走
循牆而莫避進惟谷以遑寧戴仁不貲感涕有隕臣某

中謝恭惟高皇之淵懿煥乎堯帝之文章森天上之寶
書度露下之玉宇河洛浮出太極是生於兩儀雲漢昭
回垂光下飾於萬物次對有列非賢不居如臣者少而
才疎老以病去逢聖明之求舊亟號召以拔淹顧以有
采薪之憂遂違不俟駕之禮逃刑已幸即拜更優久歸
守東岡之陂扁舟載月忽夢入西清之序榮光屬天茲
蓋伏遇皇帝陛下聖孝通神仁恩翊物念吾父有所愛
之犬而況於人謂微臣如遺堊之蛇未旌其隱曾是真

元之朝士得見會昌之新春告厥臣工昭其德意臣敢
不吉蠲若厲顯相必齊仰瞻奎壁之芒寒俯嚴香火之
尊奉弱水三萬恍親銀闕之雲大椿八千祝為黃屋之
壽臣無任感天荷聖激切屏營之至

賀郊祀大禮赦書表

惟皇作極禮再舉於明禋見帝於郊躬八觚之肇祀備
成熙事敷錫庶民臣某中謝竊以儲精穆然斯格神明
之感有孚顙若乃來郊廟之驪偉上聖之勃興赫稜容

之於樂乘觀臺之日至欸泰時以星陳嘉荐令芳衆樂
融冶乾端呈露月穆穆以金波神采宴娛靈裔裔其風
馬一人慶賴百度昭明恭惟皇帝陛下德牟往初恩被
動植克綏先王之祿祀以配天故得萬國之心告於后
帝均受釐之萬壽式歸胙於三宮臣老矣山林邈焉天
日奉璋左右有慙薪禰之詩銷玉激揚願上休成之頌
謝郊祀大禮進封開國子食邑表

帝望竹宮慶侈兩圭之祀子執穀璧恩陞五玉之班仰

在上以高高俯臨深而戰戰臣其中謝竊以燁炮翟閭
之畀匪勞不訾公侯伯子之封可輕以假而臣老歸粟
里病卧漳濱逢天子親郊之初隔諸侯助祭之後籩豆
維旅顧何力於駿奔土田附庸乃不功而下拜茲蓋伏
遇皇帝陛下唯天為大如日之升受命穆清俶載欽柴
之燎湛恩汪濊溥將枯木之榮臣謝生不貲矢死無實
歸美報上願賡小雅之章助順自天永祈大有之吉

謝致仕轉通議大夫除寶文閣待制表

請老而瀆再三始蒙制可增秩而職四等重拜恩隆敢
圖暮景之桑榆倍費重霄之雨露臣某中謝伏以漢歸
疏傳蔑聞及嗣之文唐遣孔戣且乏留賓之養未有國
朝之仁惠曲全臣子之行藏自祖宗而相傳至明聖而
彌篤如臣淺陋首被龐洪年已至而呼天數斯瀆矣王
留行而曠日久而聽之若不得已而乃從且無不盡其
加厚豈惟老馬之罔棄復許見犀而後行陟以文階之
優進以寶儲之峻雖卧埜水白鷗之岸未離春風玉笋

之班大隱而乃隱於朝廷在外而如在於王室一命再
命三命身及子以俱榮大書特書屢書言如綸而下飾
油雲朝沛落木秋萌茲蓋伏遇皇帝陛下所性乾坤之
仁斯心父母之愛念士之砥節也在進退不使其虧而
上之待下也有始終必過其願遂假三錫以張四維臣
餘生幾何大德不報歌頌盛業媿非雙宋玉之才壽富
多男惟有萬堯年之祝

謝明堂大禮進封開國伯食邑表

惟皇有慶奉瑄玉於合宮曰叟何功執躬圭而啓宇
三加厚矣重拜榮如臣某中謝伏念臣已致為臣猶
進以律益以孝理天下者不遺於小國而有事於上帝
者或及於配林奄有龜蒙荒魯僖之錫土益以邺殿覲
晏子之辭封大德溥博以如天小心進退而維谷茲益
伏遇皇帝陛下精裡燾載報本祖宗祀乎明堂以教諸
侯之孝光於四海故得萬國之驩惠此翟閭燕及愆邁
臣敢不礪乃末路慨然永懷臣三千人同一心而報上

伯七十里誓九死以于蕃

謝除寶謨閣直學士表

聖謨新閣森天上之寶書法從崇班綴西清之學士墮
慶霄之異數賁山澗之遠臣戴恩不貲圖報無所臣某
中謝恭以光皇之立極煥乎丕訓之詒謀曰都曰俞禹
無間矣有典有則宋其興乎屹璇題之造天乾坤闔闢
藏金匱而鏤玉雲漢昭回盡簡英奇以司文獻如臣者
學焉將落老矣無能分甘痼疾於煙霞敢夢末光於日

月楓林楚水久違長樂之鐘聲銀闕金宮忽近瀛洲之
雲氣茲蓋伏遇皇帝陛下慕親如舜對食見堯謂臣在
昭考之廷嘗陪鴻鵠之羽翼俾臣聯柱史之職盡獲龜
龍之圖書而臣歷事四朝蔑聞寸效媿彼十八仙之盛
以文辭鳴惟茲三萬歲之呼使聖人壽

謝賜衣帶表

瀛洲方丈驚頭白以初登內帑宮衣偕腰黃而並受迺
九重之異數非八柄之彛章自天以來躋地而偃臣某

中謝茲蓋伏遇皇帝陛下典嚴在筭惠篤薦紳軫仲由
之緼袍錫之三服惻啟期之帶索束以兼金而臣感恩
不貲圖報無所蔑然縣簿多慙疊雪之香蘭爾摧頽第
怯萬釘之寶

謝郊祀大禮進封廬陵郡侯加食邑表

觚壇饗帝莫助宵衣之勤梓里建侯惠徼晝繡之寵家
有即拜巷無居人咸謂烟波之釣徒亦錫山川而啟宇
臣某中謝竊以士伯之賞瓜衍地豈故鄉買臣之守會

稽位非列爵小臣何者異數兼之茲蓋伏遇皇帝陛下
興禮從周由仁蹈舜郊祀天地式尊祖而敬宗聲教朔
南溥行慶而施惠而臣功無橫草恩與分茅執以信圭
誦三復斯言之玷佩之侯印肩萬邦維屏之忠

謝以男長孺官係陞朝該遇郊祀大禮封叙
通奉大夫表

白鳥九子天矜反哺之情丹鳳十行雨施流垠之澤永
錫爾類以及其親臣某中謝竊以神祖建官元豐改制

有若右光祿之秩實視小司寇之職非考績與異恩豈
僭賞而虛授如臣所履久挂其冠巢由外臣不在翟閤
之數堯舜行德尚同仁壽之民赫然龍光飾是駕蹇茲
益伏遇皇帝陛下孝通覆載恩被宵翹謂能仕而教之
忠子承父訓故率親則等而上人欲天從而臣月露為
家漁樵爭席三春寸草莫報青陽之暉億載萬年永祈
黃屋之壽

謝除寶謨閣學士表

臣某言昨具狀奏乞免召命正月十五日伏準去年十二月十五日奉聖旨依所乞除寶謨閣學士臣尋具辭免伏蒙聖恩頒降詔書賜臣不允仍準告授臣寶謨閣學士通奉大夫致仕臣已於三月二十九日望闕謝恩祇受訖者績無可考進所職以為真禮既平優更於家而即拜民之多幸人謂斯何臣某中謝竊惟學士之名首出從班之右非星辰聽履舊入長於六卿則雲漢為章久代言於兩禁望實具美朝莖乃孚如臣者少也慙

愚老而灾疾六十六而解組夢隔日邊七十四而掛冠
蹟荒霞外夫何下澤之叟遽躡登瀛之仙花底玉堂月
伴桃源之棹雲間銀闕風恬蓬渚之舟覆載無私豚魚
其信茲蓋伏遇皇帝陛下天仁浩浩聖澤淵淵文獵渭
濱上誤熊羆之繇漢招商嶺何裨鴻鵠之歌祇辱詳延
不稱明詔臣被恩汪濊次骨縈懷擬周易八八卦辭俯
慙家學同天皇九九萬歲仰祝帝齡臣無任感天荷聖
激切屏營之至謹奉表稱謝以聞

除寶謨閣學士謝賜衣帶鞍馬表

宮衣疊雪帶分寶以垂金天廐亞龍鞍被銀而歆玉一
之謂甚四者難并拜君賜之便蕃媿恩榮而瑟縮臣某
中謝伏念臣奮身徒步抱膝一寒何四年俛仰之間被
再錫服乘之寵裂荷製芟初驚齊服之華破帽蹇驢未
識宛駒之駿茲益伏遇皇帝陛下衣被萬物駕馭羣材
察臣罷駕皮連霜而遠放念臣監縷頭戴笠而苦吟萃
此衆珍賁於一叟臣敢不服之無斃喜以長鳴安吉新

衣脫儒酸於陋巷敲推緩轡歌帝力於康衢

遺表

臣某言日華難繫方醫入於崦嵫霞痼弗瘳忽溘先於
溝壑須臾忍死冥漠長辭臣某誠哀誠戀頓首頓首伏
念臣資也樸忠學焉狂狷少有聞於師友直道而行長
無心於功名得時則駕叨賜第於高廟受深知於孝宗
光皇羽翼之不遺其如疾疢聖主弓旌之屢及俾玷綸
恩臨其將終賁以今召遂視星辰之履預加帷蓋之恩

平生所蒙晚歲彌寵而臣冰漸以盡器覆於盈氣息奄奄已咫尺於黃壤精神眇眇猶奔騰於赤霄徒深慕戀之誠莫効糜捐之報伏願皇帝陛下聰明神武剛健正中乾清坤夷暨聲教於四海天長地久為父母於萬年臣無復再瞻於槐宸自此永沉於蒿里潛然出涕仰止陳詞臣無任攀戀永訣之至

誠齋集卷四十七

欽定四庫全書薈要卷一萬五千六百二十五

集部

誠齋集卷四十八

宋 楊萬里 撰

箋

代賀皇太子箋

恭審對越帝暉宅於儲嫡行一而得三善適駿元良之
聲重明以照四方丕承中正之吉恭惟皇太子殿下系
隆禹子右序湯孫和惠通於神明仁孝聞於天下久問

龍樓之寢肇新銀榜之宮漢家雜霸之言是將奚取老
氏養性之福以次有陳某綴以司存阻於班賀山輝海
潤方觀樂舞之新秋實春華何俟賓僚之助

代賀皇太子冬節牋

土圭景至有融重日之光葭琯氣浮不應一陽之復宜
鼎來於祉福以鍾美於元良恭惟皇太子殿下仁孝日
躋溫文天粹東序舞籥咏禮樂之緝熙西學尚賢挹詩
箴之儆戒倣臨華始翕受邦休某縻以攸司隔於稱慶

仰惟子職欽承二聖之歡樂只時和奉上萬年之壽

賀皇太子冬節牋

日在北陸占景至之重光帝臨中壇均休成於亞獻
兼此疊雙之祉集於明兩之暉某中賀恭惟皇太子殿下
天縱狗齊月將學問哀對陽生之復遵循邦慶之崇出
則執圭贊多儀於五等入而舉玉介萬壽於兩宮諸福
之祥如川方至某靖惟謏聞虞侍末光詔冬讀而典書
何裨周序銘日新而進德願誦湯盤

賀皇太子年節牋

頌栢葉於王正有開震治奉玉卮於慈禁式介壽祺肇
允川長之元棐迪麗明之吉恭惟皇太子殿下在躬實
獻立愛如春當獻歲之始和慶東朝之八帙堯年舜壽
驩同二聖之重禹子湯孫見過三天之一稽諸載籍曠
不前聞某自媿庸虛叨陪虞侍東風解凍莫窺少海之
兩涯春日載陽徒仰重輪之五色

謝皇太子頒賜誠齋二字牋

玉宇寶書賜一隻之白壁槿籬茅棟騰千文之瑞光自
媿堊人恭承嘉惠某中謝茲益伏遇皇太子殿下學闕
百聖天縱多能於兩宮問寢之餘傳二聖揮毫之秘龍
跳虎卧得精妙於太皇霧結雲霏憲昭回於今上某敢
不刻之琬琰垂厥子孫袖有驪珠函山川之輝媚家無
儋石藏星斗之文章

謝皇太子令侍宴榮觀堂箋

宣猷清宴陳有踐之多儀陋巷臞儒際不貲之榮遇仰

承隆施俯極中藏某等中謝此蓋伏遇皇太子殿下生
而獻聰緝以問學眷在宮之賓贊久服采於後先秩鴈
禁之初筵集鳳莊之邃宇花迎劍佩鶯避傳呼賦橫枝
却月之詩灑渴驥奔泉之字書漏稀簡色辭晏溫至於
酒肴之旨且多箱篚以將其厚香羅疊雪織天上之七
襄醉梳揮金出幣餘之三品自朝至昃不醉無歸某等
自視歆然一寒如此瓊樓玄圃恍驚竒麗之觀黃卷青
編願效研覃之助

賀皇太子冬節箋

珠聯璧合聚七曜於園穹泉動芸生復一陽於亞歲宜
函蒙於多祐用詒燕於元良某中賀恭惟皇太子殿下
作式儀辰承規景數淵冲玉裕仰進德之日新海潤山
輝格集祥之川至對於穀旦集厥闕休某自視抱虛叨
塵奉秩待陰陽之定願陳呂令齋戒之辭見天地之心
請玩義文來復之理

賀皇太子年節箋

春日載陽臨泰亨之肇序盛德在木表震治之承天欽
時休嘉用集冲裕某中賀恭惟皇太子殿下英姿天縱
典學日新繼明而照四方紹休二聖之緒元良以正萬
國卜年百世之長獻歲在辰洪禧有行某叨塵儲隸虞
侍末光栢葉椒花竊鄙辭人之頌山輝海潤願陳雅樂
之章

賀壽聖皇太后箋

重華慕親決聖謨而與子慈福就養慶天統之立孫命

與維新尊其有極臣其中賀恭惟壽聖皇太后殿下象
月臨照法坤靜專仰太一之常居密移躔度近思齊之
京室親執清溫有行萬年之壽臧永膺二帝之虞侍臣
屬分符竹遠在江湖銀闕金宮望蓬萊之雲氣楓林楚
水隔長樂之鐘聲

賀壽成皇后箋

乃聖養親后丕承於厥志自天與子母克相於其猷俯
仰相輝清寧咸若臣其中賀恭惟壽成皇后殿下懿恭

有煒持載無疆釐降媯汭之瀕欽於虞舜嗣徽京室之
嬪媚於太任躬慈福之婦功佐重華之子職三宮齊聖
萬壽維祺臣屬以守符遠在外服周廬千列莫陪班綴
之趨嵩嶽三呼不勝頌禱之極

賀皇后箋

壽皇戀母之誠遜於元子嗣聖稟親之命宅乃當陽慶
縣宗祧福益寰宇恭惟皇后殿下稟資淵懿迪德靜方
暘谷昇輝初得天而臨照望舒載朏實助日之光明德

與之齊福何無艾臣舊塵家令新覲邦榮虎嘯龍興敢
作依乘風雲之想鳶飛魚躍幸居鼓舞造化之中

賀壽成皇后箋

萬乘來朝鋪洪休而於鑠二親受祉發嘉號以攸同邦
家榮懷動植奮豫臣其中賀恭惟壽成皇后殿下發祥
渭涘婉德河洲贊壽皇之燕謀抵龜而決啓聖子之凝
命定鼎於中宜勤崇而垂鴻以歸美而報上必得其壽
娥暨舜以匹休遙觀厥成似與文而均福天地參立日

月並明臣拘以守符遠在外服千官雲集莫陪駕鷺之
充庭萬歲山呼不勝燕雀之賀厦

賀壽聖皇太后箋

聖子神孫世相傳於大寶壽皇聖后福並受於鴻名仰
惟慈極之尊對越在宮之慶臣某中賀恭惟壽聖皇太
后殿下肇脩內治同濟中興如月之恒久照東朝之數
躋與天齊壽長瞻南極之一星觀子子婦婦之榮光集
老老幼幼之虞侍冠三宮於霄漢之上備萬福於書契

之前臣嬰以珪符隔於軒陛天顏有喜豈云將母之不
遑地勢無疆更祝歷年之多所

賀皇后箋

一人必有所尊以言具慶萬物不足以報莫重鴻名典
章焜煌聲施溥博臣其中賀恭惟皇后陛下柔儀載穆
淑問有孚始初清明躬行子職之恪晨昏定省日勤婦
道之供從玉車於東朝奉寶璽於南極錫福而得其壽
二親攸同作聖而觀厥成一字盡美庭闈慶賴海寓榮

懷臣不意凋年親逢盛際金銀宮闕咸仰五雲之靚深
珠玉山淵幸同萬物之輝潤

賀皇后受冊箋

壽皇作書自天有命聖主立后與月合明慶發宮闈化
行海寓臣某中賀恭惟皇后殿下令儀淵靚懿行柔嘉
夙佐青宮久問龍樓之寢同升紫極允宜象服之尊行
采參差蘭林發越佩環鳴玉既啓夜未央之勤筭總衣
紳更陪暮又至之敬臣舊塵儲隸欣覩邦榮仰乾緯之

四星光華首出占坤爻之五位元吉在中

賀壽聖皇太后箋

外屏初臨中宮乃建是為甫田之孫婦益廣進饘之供
仰事思齊之祖姑用介含飴之樂臣某中賀恭惟壽聖
皇太后殿下道侔坤厚壽與天長見堯舜禹之丕承世
傳斯道若姜任姒之並處家嗣徽音三宮相輝萬福方
永臣屬嬰符竹邈在江湖雅意本朝敢作班庭之想乃
心王室實勞賀厦之悰

賀壽成皇后箋

聖聖相授本再造而繼承婦婦克諧祇重慶之溫清椒
壁有煥蘭陔載欣臣某中賀恭惟壽成皇后殿下德婉
帝尊躬嚴家儉化天下以婦道媚於慈闈正朝廷之人
倫式是中禁仰奉含飴之樂俯膺佩悅之怡于萬斯年
既多受祉臣屬分符竹邈在江湖衆星之環北辰遙瞻
象緯一日而仰三后與被化光

誠齋集卷四十八